

LA TARASCA



Association pour l'Enseignement de la Langue d'Oc

---Decembre de 2023---

« Soustèni lei lengo regionalo e soun aprendissàgi »

Bràvei paraulo de nouaste nouvèu menistre de l'Educacion nacionalo ei deputa, qu'an au mens lou meriti de nous chanja de la guèrro que Jan-Michèu Blanquer a mena contro la lèi Molac, meme se degun de nautreis es tant nèsci pèr n'espera miracle. Lou President Macron li a fa ecò en prouclamant (à Villers-Cotterêts !) : *vouàli que nouàstei lengo regionalo siegon enca miés ensignado e preservado* : grègou ! Alignamen o noun dei planeto, saluden tambèn lou Reitor de l'Academié de-z-Ais-Marsiho que vèn de manda en tóutei leis escoulan, coulegien e licean, uno letro pèr leis empura à s'apoudera de l'ouferto (meigrinello, pecaire) d'ensignamen dóu prouvençau. Iniciativo chanudo, que pourrié au passàgi tira l'uei dei famiho e surtout d'uno cadeno amenistrativo toujours larjamen entrepacharello. Regreten soulamen que la missivo si restregne toujours au soulet relarg prouvençau sènsò jamai l'alarga au rèsto de la lengo d'o, e pas meme au parla aupèn toujours que mai deleissa.

Au Councèu academic de la lengo regionalo que vèn de si teni à-z-Ais s'es senti que leis assouciacion e lei sindicat coumençavon d'èstre miés prepara à de pousicien couèrento sus soun aport à l'ensignamen e sus sei revendicacion, que dóu còup soun pus escoutado e discutado, emai siguessian proun luen dóu comte sus lei mejan, sus lou countinuous rouigamen dóu nombre d'escoulan e d'establiment - mai uno escolo bilengo sagatado au Martegue -, sus leis

entramble que contunien de s'amoulouna, e sus l'enregamen dins uno planificacion apelado pèr la lèi Molac, mai encaro à l'estat de pantai. Autre miràgi que de longo resquiho, la counvencion Estat-Regien : serié enca'n còup à mand d'èstre signado, que nous an mai afourti. L'espèr fa viéure.

L'estiéu e lou coumençamen de l'annado an vist renaissè de manifestacion qu'èron estado arrestado pèr la situacion sanitari : lei tradicionau Rescòntres occitans en Provença, e lo Grand Pres Literari de Prouvenço remés aquest an à nouaste coulègo Silvan Chabaud. Un bèl e sabènt óumàgi ès esta rendu à Roubert Lafont pèr l'IEO à-z-Ais. Nouàstei partenari regionau de l'APLR acüissien à Niço lou Coungrès nacionau de la Federacion pèr lei lengo regionalo dins l'ensignamen publique, e lou Forum d'O poudié enfin teni soun coungrès à-n-Avignoun remanda despuei dous an. Lou Couleitiéu *Pèr que viscon nouàstei lengo* vèn d'èstre audiciona à l'Assemblado Nacionalo sus lou proujèt d'estatut pèr lei lengo de Franço : affaire de segui.

Lei projèt de l'AELOC soun en routo, la fourmacien à l'INSPÉ es enregado, emé nouàstei partenari avèn pèr lou proumié còup proupousa au Reitor de durbi l'an que vèn lou counconcours especiau lengo regionalo dei mèstre d'escolo ; si tenèn lèst pèr ajuda lei candidat à la validacion, lei Cantejadas si meton en plaço dins lo relarg de-z-Ais emai dins aquéu d'Arle, e preparan la sourtido dóu mounumentau Diciounari dóu parla miejournal que nouaste regreta coulègo René Domergue nous n'a fisa lou destin.

Alan Barthélemy-Vigouroux